



隱湖倡和詩集卷下目錄

及辰倡和

毛晉

陳朝典 字溫如太倉人

陳瑚

毛褒 字華伯常熟人

陳遜 字子謙太倉人

詠瓶中落梅

徐遵湯

毛晉

讀徹 字蒼雪號南來老人中峯釋

陳瑚

文祖堯 字介石雲南人

曹周鈞

費參

顧夢麟

穀雨日中峰止宿

姜垓

字如須常州人

讀原徹

林雲鳳

毛晉

遊吾谷

陳中瑚

陳朝典

諸士偉

字庸夫崑山人

毛晉

花朝仲木招入山看梅

陳瑚

顧夢麟

嚴陵秋

汲古閣聽雨

周榮起

毛晉

照音

字遯聞中峯釋

陳瑚

追和王梧溪貞燕詩

錢嘏

毛衮

賦得歌舞閒時看讀書

陳瑚

杜文煥

字發武遼東人

費參

胡梅

字白叔吳縣人

賦得天寒有鶴守梅花

毛晉

顧夢麟

金俊明

俞南史

字無殊吳江人

文果

字園公

祝溢德

字儉夫吳縣人

陳瑚

湯得初

字以道

湯得中

字鐵庵

王育

錢達

上授

字道敏

顧涓

癸巳元宵載德堂觀燈

馮班

毛袞

題杜字山

周之玠

字玉介常州人

和贈鷗

毛天回

字昭于一字叔豹常熟人

燈花

朱鶴齡

毛晉

錢祖壽

字福先號三峯常熟人

陳瑚

馮班

嚴熊

字武伯常熟人

葉裕

馮廷賓

字于王號虞牧常熟人

周留林

字子茂常熟人

顧涓

馮武

毛袞

許世忠

字貞服常熟人

葉奕苞

字九來崑山人

梅遊雜詠

道源

陳瑚

費參

顧夢麟

毛褒

毛袞

錢嘏

泉遊雜詠

毛晉

顧夢麟

嚴陵秋

道源

陳瑚

和白香山我年五十七

毛晉

彭行先
字人

蔣棻

字晚仙號南咳常熟人

孫永祚

嚴炳

字孚文常熟人

薛家

字諧孟法號堆山常州人

楊補

李模

字玄望人

方夏

字南明長洲人

玄弼

舊京釋

破山禪院夜話

楊補

毛晉

契惠

字鶴如號邁庵興福釋

王咸

袁默

錢嘏

馬弘道

春盡日冒雨尋山

錢 嘏

葉國華

字白泉崑山人

陳朝典

陳 帆

字際遠常熟人

陳 遜

陳 邀

字子莊太倉人

毛 晉

毛 表

毛 宸

字黼季常熟人

丙申人日雪中過隱湖遇定遠

陳 瑚

馮 班

錢 嘏

毛 晉

從三峰泛隱湖訪潛在

照 影

字指月松陵釋

興福禪院復遇潛在

楊 補

契 惠

午月二日登君山

錢 嘏

瞿有仲

字有仲常熟人

費 參

毛 晉

拜季子墓

陳 瑚

錢 嘏

毛 晉

費 參

八月上弦遊華山

楊 補

毛 晉

馮武

過徐元歎落木庵

毛晉

楊補

馮武

八月初十夜登虎丘

楊補

毛晉

馮武

目耕樓玩月

瞿有仲

錢嘏

陳遜

毛晉

張溯顏

舟過荻溪遇與公

毛晉

王咸

小重陽日載菊過隱湖

寂覺

字文照白椎釋

照瓊

字雪隣白椎釋

毛晉

此靜坐燈下看菊

顧湄

毛表

毛宸

丁酉上巳遊白鴿峰

錢 嘏

黃 滌 字宿許太倉人

馮 武

毛 表

寒食後三日汎湖

錢 嘏

毛 褒

白樵庵法會

徐學孟 字子淑吳縣人

馬弘道

陸貽燕 字庭翼常熟人

毛 晉

寂 覺

行 潔 字雪界圓明釋

照 霽 字清旭廣慧釋

照 瓊

照 行 字一義白樵釋

照 萍 字一揆白樵釋

丁酉仲秋喜子晉過傲廬

林古度 字茂之號那子福建人 毛 晉

八月九日丁齒生招遊烏龍潭

毛 晉

中秋後遲潛在過鶴林

通 門 雲半 毛 晉

丁酉秋客白門晤子晉

范又蠡 字小范 毛 晉

丁酉重九登雙蓮閣

馮 班 毛 晉

毛表

鶴林小集

通門

丁毛

戊戌春宿雲半居

中錢

毛晉

寄懷潛在居士

正岳

湖南見插秧

通

雲

字石琦雪竇釋

瞿師周

字師周常熟人

馮武

字豁堂號宗庵三峯釋

毛晉

陳瑚

毛晉

馮武

錢嘏

瞿有仲

陸貽典

雨中雜詠

陳瑚

馮武

己亥正月過載德堂張燈夜話

錢謙益

陳瑚

歲中感懷呈潛在

陳朝典

毛晉

陳瑚

唐在

字在茲太倉人

錢逵

錢嘏

偶憇雲半居

通門

毛晉

超

字谷音鶴林釋

已亥孟夏移居石村

王

字僧祐吳縣人

毛晉

維摩寺訪天則和尚

毛晉

隱湖倡和詩卷下目錄終

隱湖倡和詩卷下

蔚村陳瑚確庵選

汲古後人毛扆黼季訂

及辰唱和

是集計詩三十三首錄一十三首

歲見攝提日躔營室狐方戒尾魚欲上冰

東郊人士驅牛南國女郎鬪燕維時湖光

閒霽天近蔚藍山色澄融烟齊聳翠七星

橋畔偏多高卧之家八字湖頭獨有行吟

之客信村衢之異俗亦喧靜之殊情爰當

家君杖國之年適共西隣種桃之日隻雞

斗酒輒用招尋越陌度阡無煩迎送兩家

父子宛同鐘山舊遊一水比隣不數斜川
風物或分題蕉葉卽席言歡或裁就松花
侵星遄寄爾乃洗研延千人之俊馬帳晨
開命駕來百里之朋王舟夜訪悉人倫之
樂事咸吾黨之勝懷至若雨餘擁火錫飛
汲古之書雪裏巡檐筒捲懷人之句莫不
被之紙墨抒我性靈計日未滿一旬爲詩
已踰廿首隱湖主人目曰及辰唱和業以
縱其遙情將遂貽於同好立春後五日陳
瑚識

元旦喜晴和放翁韵

毛晉

十年風雨兼水雪今喜朝陽蕩積陰鬱壘爭先擎
燭換屠蘇落後對花斟卜瓢父老歡歌早報竹兒
童聚紙深獨步空庭無一事輕開牕紙看蘭心

同和

陳朝典

晴鵲喜呼新歲月柴門旭日歛窮陰甘修田舍辛
盤供煖冽山家柏子斟野外梅花吟自放江干春
草夢初深十年萍梗無餘事書債尋常未了心

同和

陳瑚

閒步衡門看山色晴光一片尚湖陰魚花浦浦吹

水動柏酒家家擁火斟田女學粧村較好隣翁圍
揖醉偏深歸來詐跌堂前地聊寫依依膝下心是日
上家大人
七十觴

元旦卽事和子美倚杖韻

陳朝典

眺眼雖山色移筇卽水邊風青湖上柳霜白渡頭
船兩鬢偏餘雪孤梅別有天片霞飛彩袖爲爾醉
新年

同和

陳瑚

春色雙扉外幽棲二水邊人添初試褐商泊夜封
船嫁棗衝晴霧移梅趁煖天野橋平眺處忘却武

陵年

三日立春潛在種桃池上適端和隱端戒雪

三上人至斐然有作依韵奉和

陳瑚

一曲春光乍入池移桃縛記最南枝捕魚從此迷
津口採藥行看隔水湄何必霜林方異種未須玉
井自多姿相過不遠溪橋路輸與山僧先我知

四日重理硯席

陳瑚

年年學稼未逢年此日重攜一研田豈有徵歌同
絳帳還憐舊物是青氈河汾佐運多名世濂維傳

心賴大賢自愧五經無一字愛眠空效腹便便

確庵師招集陶家舊廬瞻拜魯國圖

毛 褒

南村喜與德為隣芳草纖纖亦被春阡陌交通色
笑合卷編相接耳提親重瞻魯國蛟門舊再拜尼
山圩頂真一路梅花啼鳥換眼前何物不怡人

五日潛在先生誕辰奉祝

陳 遜

流霞片片醉瑤天笑祝花源一地仙繞膝有人皆
愛日紀時無曆每忘年家非彭澤仍栽菊社不天
池亦種蓮料得幽心齊萬物閒雲飛鳥與周還

六日載德堂話雨

陳 瑚

日日晴光盪碧川忽生漠漠雨如烟茶添稚子寒
圍火書寄山僧夜放船潛在寄書端和上人詩敵未降姑退
舍酒心無住亦叅禪莫愁名教非當日此地中原
文獻傳

次和

毛 晉

何處喧喧雨滿川吹爐忽起溼雲烟朝傳新句忙

欹枕確庵枕上成詩每晨見示夜束殘書寄釣船是夜寄元酒

興方酣憐病叟余病不能飲文通久負惱臞禪端和索

去竟而君家吟榻蒙頭被借我茅庵當紙傳

四
七日微雪有懷中庵諸道長賦寄末限高適

句

陳瑚

剝啄無人徑欲蒼一簾風細到匡牀天容高臥微
飄雪花以輕寒小試香書到快心浮大白碁敲孤
影坐昏黃依稀憶得前賢句人日題詩寄艸堂

次和

毛晉

隻鶴東西髮已蒼入年燕息卧雲牀劈牋分染兩
池墨刺燭同傾一盞香平野雨肥齊竊綠疎枝月
淡褪微黃巡檐聚得酸辛味

韓偓寄吳融云語
餘相聚却酸辛人

日題詩寄艸堂

余每見除夕元旦家歌戶咏輒袖手謝之
今歲上日晴光千里瀕年未有顧而樂之
適兒子表誦放翁己酉元日詩戲爲泚筆
索確庵同和伊太公溫如暨長君子謙次
君子莊與余館甥禹思猶子叔豹及兒子
褒袞皆欣然從事自是伊唔之聲應和於
兩家簾幙間但見板橋霜燦銀鹿已來甕
牖月斜玉牋方去或瓶花共賞或斗酒相
敲轉盼已至人日矣昏曉未幾紙墨遂多
依流班坐擊鉢而歌酒闌溫翁先生正襟

而起曰樂極矣歌可以止矣忽中峰蒼公
邀余入山寄老梅一枝且曰及辰爲茲遊
勿放過使花神見笑予嘉其意卽名是卷
爲及辰倡和以貽中庵寒明諸子爲入春
資暇之談隱湖毛晉跋

詠瓶中落梅

是集詩凡六十八首錄二十首

徐遵湯

護得霜濼與日烘早開遲落總歸空饒他葉底青
青子伴我牕前細細風縱使香消魂不遠只愁影
散夢難通莫云勺水無功力殘白還能待嫩紅

尋詩驢背已空回檻內飄英亦點苔石榻便爲香
雪阪紙屏曾作避風臺不沾驛路并山逕偏墮芸
編與竹杯漫笑擊瓶輸抱甕村童又折杏花來

次和

毛晉

看來片片撩閒思况值無聊獨坐時直下恍垂拋
枕淚分飛重簇送人眉吹殘玉笛頻頻咽彈罷瑤
琴脉脉窺生自羅浮今蛻去傾城焉用浣紗施
煖閣相依絕點塵衆香國裏返魂身短屏隔斷空
中絮明鏡飄零月下春碧海未歸虛設願雪宮深
鎖獨傷神冶郎不作尋春夢休把離情補會真

六
好將白首一時回豈逐春風葬砌苔落魄未曾離
几席招魂依舊傍粧臺夜牕彈指生禪思曉燭評
愁費酒杯記取玉容誇雪艷風流從此下場來

再和

每對梅花有所思折來相對不多時一樽呼友同
開口幾片催詩又皺眉紛入硯池疑雪聚飄過簾
幙許蜂窺隱囊欵几從狼藉不似尋常錦繡施
斗室沉沉不動塵空山分得歲寒身癡情永護消
長日惡劫匆忙別早春几上僅存流浪迹瓶中誰
遣主花神欲和殘雪吞香瓣鍊脚傳方恐未真

同和

釋讀徹

粉黛休誇麗日烘美人黃土早知空小牕落盡無
聲雪一夜飄來何處風硯北已探消息斷嶺南猶
自夢魂通玉鱗散下研朱濕點點愁看滴淚紅
勺水無根繫所思總能愛養幾多時琴中彷彿隨
流水鏡裏分明失画眉幽鳥數聲春欲去闥房一
竇月來窺筆牀應共花平雨可似當年晏坐施
霜凝滿案拂香塵一瓣袈裟不著身開到多情能
結子落來無地可藏春殘生自足延花命不死還
應讓谷神眼底爲憐誰似汝澹然相對最清真

同和

陳瑚

一枝不借艷陽烘
悟得離根色相空
點筆煖雲能作雨
覆書香雪自爲風
魂飄尚藉垂簾護
骨在還憑勺水通
顛賴久拚人棄擲
豈同繁卉喚紅紅
折來薄命自尋思
况是江城濺淚時
顧影祇憐輸鍊石
全身猶幸剩鬚眉
未容浪蝶侵書坐
肯許狂蜂過幔窺
收拾冰心黯然去
縱教拂拭向誰施
斜倚芸巢迥客塵
瞥驚天女幻多身
胆瓶自覺寒暄候
斗室何勞去住春
羌笛一聲虛弄色
玉關千里暗傷神
捐除冠珮心無罣
疑是前生漢子真

十分春色幾分回
零落何如葬砌苔
遷客有心依故國
美人無夢遶陽臺
挑燈賦別愁千斛
呼酒招魂怨一杯
忽忽輕風披研席
暗香還欲上枝來

同和

文祖堯

冰姿百折意難回
總是飄零不染苔
數點積成香雪案
多情散作雨花臺
擊壺空有留春句
把酒聊傾送客杯
斗室睽違知未久
東風一轉又重來

同和

曹周鈞

冷蕊疎枝撩我思
爐烟茗椀苦吟時
香飄書幌沾佳句
影落粧臺映画眉
憐愛有情邀月照
護持無

計怯風窺明妃玉骨埋青塚圖繪難將鉛粉施

同和

費參

玉壺冰暖日初烘素質俄驚冷艷空搖落幸偕書
覆几飄零不待雨兼風短篝夜靜香猶在明月牀
虛夢未通蕭械久同逋客况豈隨桃杏泣殘紅
尋春無計定誰思惆悵瓊姿欲謝時夜讀喜霑高
士傳晚粧羞上漢宮眉墨波點雪疑星聚花壘依
牕候月窺不作重茵供賸客任教絃管傍簾施

同和

顧夢麟

默然香影費尋思纔過開時又落時別去似違高

士面拈來難近美人眉誰家橫笛風初遞昨夜臨

牕月尚窺明歲軍持重作供長教青帝駐恩施

幸免凋零陌路塵偏于簾閣示分身魚鱗點硯翻

玄石馬鬣俚屏葬淺春肯信羅浮仍化女祇宜姑

射自爲神花光死後風流盡誰與含毫一寫真

穀雨日中峰止宿逢子晉暨若撫仲榮兼悼

伯高之逝

是集詩凡十首錄六首

姜垓

散髮相逢一釣舟滄波萬里使人愁翠屏孃孃春
暉淨黃鳥關關曉閣幽亡國子山仍寂寞渡江公
瑾最風流應劉儕輩今如此倚杖何妨汗漫遊

喜如須子晉若撫仲榮同宿山中次如須韵

釋讀徹

情緒渾如不繫舟春寒花鳥共閒愁呼燈炤雨客
仍至扣戶無聲山更幽人聚七賢同雅集竹栽千
畝抱谿流禪非玉版叅何有玄度重來感昔遊

同和

林雲鳳

緇素何緣得共舟塵談相對且消愁背城取路寧
嫌遠到岸登山轉覺幽風入深林吹忽斷泉當曲
澗咽還流因叅講座聞新義不負今宵秉燭遊

同和

毛晉

雙燕分栖竝繫舟入林三笑解春愁垂簾聽雨拖
筇緩隔座看花試茗幽遠近林丘啼鳥換存亡朋
舊嘆雲流結茅偏愛南山好收拾詩編續澹遊

留贈蒼雪法師

姜垓

芳草南塘雨欲霑蟄龍長伴老夫潛藤輪哀壑驚
玄象角枕殘鐘送黑甜隨意林泉供我設移時櫻
笋為君淹西山春色還無恙遮莫歸舟傍酒帘

次韵奉酬

釋讀徹

雲氣空濛半衲霑君自稱半衲頭陀河清惟待擬龍潛嚼
來世味渾如蠟染透身香別有甜抱被何妨逢雨

宿倒衣贏得爲余淹支硯况是春三月一路松棚
颺酒帘

遊吾谷

有序

是集詩凡一十
一首錄四首

陳

瑚

玉峰諸子來隱湖之上舉家大人觴越三
日載酒爲吾谷遊擬抵藤溪而還大人亦
攜杖違入谷則綠陰萬狀松花亂飛諸子
盤桓其中不忍去白庵李子奮袂而呼曰
樂哉斯遊何必藤谿第不可無詩以志時
日請用爲令後者罰無筭瑚乃僭成五韻
遂相與屬而和之時汲古主人入郭未至

聞之鼓枻而前則諸子帆影參差已遠在
碧空矣先五日潜在曾招義扶兌庵一士
同飲仲木山叅扶醉散步谷口烟光漸暝
悒悒而別今得續遊以盡其勝因寄是卷
索義扶諸子遙和焉

載酒過山西雲深谷口迷數峰青自出萬樹綠初
齊鳥帶餘花亂人隨返照低晚風歸棹急回首想
藤谿

次和

陳朝典

渡口夕陽西寒烟咫尺逃片山黃石古千嶂赤楓

齊長嘯天疑近危登樹欲低短筇筋力倦扶醉過
青谿

同和

諸士偉

日夕解蘭西春山細草迷水迴千嶺秀天迴萬松
齊怪石麒麟仆明花錦繡低風塵看欲暮歸去臥
雲谿

同和

毛晉

風送峭帆西晴光著眼迷村村紫靄凝樹樹綠天
齊人影隨雲度山花趁燕低偏余來最晚返照下
前谿

花朝仲木招入山中看梅風雨阻棹夜酌寶
晉齋月色忽佳却寄

是集詩凡七首錄
三首

和潛在韻

陳瑚

鳩居吾亦愛吾廬傳道城春花事初香滿山中遙
置酒雨來湖上嬾巾車懷人擬續王猷傳種樹慵
鈔汜勝書燈火紙牕青未了忽驚華月照衣裾

同和

顧夢麟

老雨狂風客子廬匆匆已度一春初閉門我愛供
高枕折簡人傳待小車罷飲忽看庭浸月破愁仍
照案攤書浮生蹭蹬皆如此豈但花前阻曳裾

依韵訓子晉

嚴陵秋

自愛梅花遶敝廬一林香雪每春初
罇罍已貫隣家酒風雨重違長者車
孤礪拂流朝滌研兩湖分席夜傳書
吹燈獨坐牕前月散落清光上短裾

汲古閣聽雨子晉出示寒山拾得二像千二百五十羅漢卷併宋刻諸秘書如行山陰道上使人應接不暇喜而作歌紀事時同

坐者中庵確庵退山暨遯聞端和二上人

是集詩凡一首錄五首

周榮起

春風劈柳春雨濃湖天濕霧霏重重蹲鳩高樹嬾

不起捲簾入坐雲濤衝同心如蘭靜言好衣裳爲我歌顛倒傑閣層懸列畫圖西陽觸目皆琳寶茗甌香鼎不停披上善同叅及素緇雲藍十幅展奇妙大比丘衆皆吾師龍眠嫡祖仇英筆四百餘年工力匹愛護能逢賞鑒真玉躡金題間細帙更看遺炤國清賢絹素神明墨妙傳宣和遺澤自清灑古香浮動澄心笈魯魚讐校縷深汲籤軸如雲供什襲天厨誤入饒腹兒禁鬻江瑤都翁集以之展轉耳目移坐臥于中艷總持嵐烟水氣奔紛接錯疑天祿藜重吹徐徐握手下樓去梅花半破迎人

語洗盡凡心骨具輕雞鳴隔屋如方曙

仲春望夜喜仲榮從江上來余湖莊握手道

故明日披閱兩令女画十八羅漢暨九歌

圖超越古人因出家藏寒山拾得二像千

二百五十人卷展玩竟日見貽長歌依韵

奉訓

毛晉

三十三山春漸濃停雲靄靄幾千重花朝雨過駕
一葉兩水灣頭潮互衝行到湖村月正好蒲帆影
向橋邊倒入門執手如夢寐貽我一幅閨中寶露
洗薔薇剪燭披雪縑皜皜湟不緇再歌九歌誓古

處坡仙列頌天人師攜出小閣先民筆阿堵傳神
或相匹千二百五十人俱海山飛走羅一帙不知
誰貌昔二賢當年嬉笑宛然傳多事貝葉落幾字
何如坦腹伸素箋曹溪一滴隨人汲四花亂墜香
風襲濡毫點綴蓮社圖後人應亦見此集開函展
卷日晷移瓊瑜榻上臥軍持茶烟香烟紛繚繞更
挾蘭風入坐吹諸君先後留題去送難存疑且語
語我學豐干亦饒舌陽春和罷天欲曙

同和

釋照音

春湖一帶烟樹濃星橋入望嵐光重舟來松陵逾

十四
百里乘風豈畏驚濤衝寶月堂中主賓好相逢一
笑成傾倒歲久懷來發祕藏亂離罕見人間寶拾
級登樓拜手披卷中龍象皆名緇虬松怪石出意
表指頭見月吾師師公麟世稱神化筆臨摹精妙
真難匹攫霧挈雲已盡奇浮杯飛錫皆同表寫真
何人貌二賢饒舌豐干宛對傳嘉苴儀形笑拈示
踰麋埽落藤溪笈獨守蒹葭自覺汲心如墻壁無
承襲仰止流風大雅名追陪却幸杯盃集成連蹈
海情忽移汲深綆短難禁持簷花霏拂續還斷竹
風聲憂微寒吹低徊暝色不忍去靜默游神坐無

語蓬心鬼眈怯疎慵沉吟漸覺東方曙

同和

陳瑚

晴光溶溶花氣濃芙蓉城外春山重書画船如天
上至櫓聲鶴唳烟波衝隱湖主人敦宿好逢迎不
覺屣顛倒來朝廷入萬卷樓火齊木難非常寶四
座何人手共披名山二朗同衣緇博稽幽討者誰
子若非經師卽人師伯時寫生有奇筆實甫臨摹
與前匹如來趺坐巍乎尊應真列侍成一表杏壇
之上多聖賢三千從者由來傳祇園得半尚不足
已驚濟濟無餘笈閣名汲古洵可汲更有珠璣藏

什襲何必靈山不眼前只今寒拾如遙集君善丹
青情欲移九歌一卷長相持其中冥感生妙悟天
機自動條風吹坐深有得遂忘去相對怡然各不
語我獨頑空門外人漫漫長夜何時曙

余與中庵退山各以事別去仲榮復有寶晉
齋同雪岸上人之作重叠前韵遥和

陳瑚

華堂燭滅笑語濃湖頭風雨聲重重浪花千尺飛
欲舞青青鬼火蛟鼉衝人生能得幾時好十千沽
酒須傾倒聚散休悲晉永和亂離曾見唐天寶巾

葛超搖短髮披任公釣魚無巨緇窮愁土室何為
者竹林蓮社吾儕師等閒相遇江淹筆龍女天孫
神巧匹昨朝響鉢珠滿囊今夜停杯錦成裘此道
于茲續聖賢隱湖風雅千載傳莫謂不經孔父削
公然博得毛公箋山水清音憑采汲作者由來陋
沿襲新聲剗刷走天涯宛似玉山草堂集開士行
行何所移白雲嶺上不堪持只此馨香滿懷袖贈
人可當笙簧吹酒闌社散各歸去春鳥忽聞牕外
語驚起幽人不得眠露立梅花待天曙

和貞燕詩

有序

是集詩凡三十六首錄二

長沙馮子振云元貞二年雙燕巢於燕人
柳湯佐之宅一夕家人以燈炤歎其雄驚
墜猫食之雌彷徨悲鳴不已朝夕守巢哺
諸雛成翼而去明年雌獨來復巢其處人
視巢生二卵疑其更偶徐伺之則抱獨之
殼爾自是春去秋來凡六稔觀者譁然目
為貞燕王梧溪賦詩紀異余感其事特表
出邀諸同人和之隱湖毛晉識

追和王梧溪韵

錢 嘏

主人能好奇為我說貞燕去年雙飛時春期始冰

泮今年獨悲語咽咽如孤雁宛轉舊巢心含悽不
忍怨

同和

毛 袞

堂上有畸人偏能識貞燕探巢辨空卵舊恨渙然
泮關關河洲睢雝雝渡口雁和風懷好音那識年
年怨

賦得歌舞閒時看讀書

是集詩凡六十三
首錄四首

陳 瑚

鳳聲鸞影冠句闌夢裏繁華覺後殘檀板暗拋虛
夜月霓裳輕卸怯春寒班昭舊事真堪續蔡琰新

詞不忍看圖史半生容靜好不將良夜換清歡

前題

杜文煥

鶯儔燕侶共盤桓
畫閣書樓夜未闌
舞罷自纏頭
上錦歌餘徐輟手
中檀閑臨綺案
焚香坐靜對縹
囊映獨看為愛伊
吾頻欲和珠圍翠
繞馨交歡

前題

費參

蹙拋歌扇擬盤桓
徙倚閒庭夜未闌
眉蹙黛痕思
問字口凝脂
暈暗聞檀好將
明月隨君詠喜有
奇文共我看
莫道紅顏不解事
夜深讎較續清歡

前題

胡心梅

歌舞閒時看讀書
泥香巢濕燕來初
懶敲檀板驚
鸚鵡笑取蘭膏
引蠹魚注目渾忘
嬌影動點頭應
見翠眉舒梨花
庭院誰能見絕勝
門多問字車

賦得天寒有鶴守梅花

是集計詩一百二十首錄一十七首

毛晉

寂寥庭院留孤鶴
伴得梅花度歲寒
落片不隨流水去
疎翎常被凍雲霞
笑同和靖孤山嶺
恐似元章淡墨灘
深夜月明疑是雪
鷺蓑斜搭倚闌干

前題

顧夢麟

擁絮荒庵歲逼除
梅開剛共鶴相於
人疑華表仙

歸處地在羅浮夢破餘坐鯁冷香知腦側步尋疎
影見拳舒短籬淺水幽棲事試問雲霄可得如

前題

金俊明

暫回雲駕遠芝田仍向羅浮繞夢偏四海已無容
足地一林聊趁冷香眠風欺雪糝情逾定月落參
橫影竝妍淡寂正宜林處士低徊達曙聳吟肩

前題

俞南史

古幹霜中自作花鶴眠深處影交加飛翔久別蓬
山路飲啄寒依處士家幽跡滿林通夢寐香心一
片寄雲霞青霄寂寂無消息難達音書訴怨嗟

歲值嚴寒草木萎梅花偏與鶴相期素衣雪映香
頻歛清唳霜空冷自知荒逕閒尋看獨步斜柯獨
立寄遐思何時得假春風便重向雲霄振羽儀

前題

文王果

江雲寂寞隴頭枝獨伴冰霜與鶴期野水離群明
月夜深林清唳晚香時歸來遼海花初放夢入羅
浮落未知立盡寒風誰共語天涯何處寄相思

前題

祝德溢

瘦影清芬永夜凝仙姿相對靜於僧三更夢醒山
如水萬樹霜寒月似冰奈爾雪衣驚翠羽無人仙

十九
斃立蒼藤明朝縱有漁舟約應謝瑤岑不共登

前題

陳瑚

木落崖枯虜栗吹梅花無語鶴心知似憐瘦骨難
爲別如對寒顏有所思立破香光人靜後踏殘空
白月明時仙姿拚老荒臺下未許春風入夢窺
永夜踰躑靜不喧但餘香氣繞衙門縱然庾嶺無
消息自有西冷入夢魂翎欲梳時吹片玉爪從舒
處點雙痕東風歲歲相期待何日銜書到故園
繞屋花光已不貧仙禽相守最天真無端此夜常
同夢應許前生共幻身圖就雙清誰作主添成三

隱我爲隣風塵極目雲山暮果信江南別有春
一寒徹骨梅花事獨鶴相依分外寒避俗有心春
寂寂印空無色夜覆覆頻驚影動窺書牖爲惜香
飛啄釣灘對此撚髭尋好句不知華月上闌干

前題

湯得初

獨立蒼苔若有期海天無伴此棲遲似憐老影風
霜靜故倚寒香飲啄時夜月焰林甘寂寞曉霞離
樹愛參差憑君欲訪羅浮夢未許梨花白燕知

前題

湯得中

萬花開盡梅花發偏許仙禽共一冬激暖有聲霜

樹老蒼苔無路水雲封棲殘烟裏空山月影落風
前半夜鐘回首海天驚夢斷橫斜枝下寄孤踪

前題

王育

寒生碧海倦飛翔狎此山中一樹芳玉色自憐姿
竝冷素華已分骨同香獨行影掉三更月小立衣
霑五夜霜只許林逋舊相識幽吟泉石共清狂

前題

錢逵

何意乾坤蕭瑟裏梅花芬馥鶴差池山林托跡原
同調冰雪相看更有誰凍蕁禁風聲未斷疎枝移
月影相隨縱然欲向雲霄去忍別孤芳歲暮時

前題

釋上授

古梅花發歲寒天野鶴相依更悄然林下月明香
漠漠水邊風斷影翩翩欲窺冰蕊雙翎側怕踏霜
苔一足拳寂寞無人常獨守恍疑踪跡是神仙

前題

顧湄

野鶴寒梅夜氣清空庭相守寂無聲亭亭瘦骨和
烟冷漠漠香魂焰月明遼海仙人千載話孤山處
士一家盟紛紛競逐新桃李惟爾霜禽不世情

癸巳元宵集載德堂觀燈話舊

是集詩凡
七首錄二

首

馮班

文譙當佳節相看興自長喧闐鏡鼓雜笑語酒樽
香月冷春猶淺燈紅夜未央尚殘年少意未謝昔
時狂

次和

毛袞

最愛初圓月凭闌引興長燭紅高吐燄梅白嫩含
香觴政方嚴始更籌已漸央村虛絲管寂少長任
疎狂

題杜宇山在支硎山下余家其旁與子晉同

遊共賦

周之玠

百尺蒼厓名杜宇去我茅堂不數武坦坡宜月復

宜秋峻壁欲奔猶欲舞結此芳隣世可忘朝催游
履暮飛觴誅茅待憇長松下盡日相看樂未央

和潛在叔贈鷗寄確庵師

毛天回

秋水淪漪素羽微淡烟和月影霏霏豈知瀚海波
濤壯故向寒汀寂寞歸曉與鷺鷥隨釣艇晚和鷓
鴒上苔磯荷香十里供游泳漫啄殘英也療飢

燈花

朱鶴齡

洞戶佳人未掩帷寒燈一穗正垂垂無端乍喜騰
烟出有待翻嫌結蕊遲光滿銀屏從落焰影沉紗
幌莫輕吹朝來江鯉音書到始信深宵慰所思

前題

毛晉

更闌孤照坐深帷時見花生不自持滿目芳菲忘
月到霎時狼籍豈風欺墮來忽點初停筆颺去還
拋未了棋錯認春歸紅瘦盡重挑餘暈和韓詩
昌黎
有燈
花詩

前題

錢祖壽

炎姿未許蝶蜂遊解笑迎人更燭幽五夜飄零隨
鼓角一時開落自春秋不資坤厚成連理却借離
明得並頭還恐殘英難向日燼寒猶帶淚長流

前題

陳瑚

倚枕蕭騷夢未成短篝無燄紙牕明校書光下花
初放刻燭吟中蕊漸生護得穠姿驚四座挑殘清
影伴三更年來風雨渾無賴且喜明朝已報晴

前題

馮斑

頻益蘭膏人未迴雙花先報吉音來風吹青瑣輕
輕動雨爆銀缸漸漸灰蛾影可容留艷朵雞聲何
事到香臺祗應要得卿卿拜珍重通宵火裏開

前題

嚴熊

星簇微紅小蕊嬌一枝香發藉蘭膏金閨有喜深
深拜旅舍無眠漸漸消螢尾生光翻覺冷蠅頭漸

長莫頻挑碁殘書罷輕煤墮祇與閒人慰寂寥

前題

葉裕

蘭膏香重夜悠悠似粟輕紅碎影浮玉檠倒垂蓮
並蒂金盤低壓鳳雙頭開當錦帳春烟暖落背銀
屏暮雨休多謝殘英猶未盡欲眠還照解衣羞

前題

馮廷賓

宵館高燒炬底蓮短檠時剔影娟娟一莖漏轉搖
書幌叠葢更闌簇繡筵旅客自挑寒夜雨歸人閒
卜早晴天莫辭晝促消遊興秉燭須看鳳蠟妍

前題

周留林

青玉燈繁綺牖明綵綵花發火炎輕蘭膏帶葢光
應減芳草凝脂落更生洞戶有心留並蒂棋聲無
意墮雙英霜蛾不避麟鬚拂狂撲丹葩枉燎身

前題

顧湄

光燦玲瓏四照寬蘭膏頃刻葢珠攢銀缸香暖矜
春艷錦帳風輕護曉寒盡道因依皆有驗誰知開
落總無端奇葩一種真堪喜女伴凝粧不寐看

前題

馮武

連槃同樹影交斜蘭室光青漸吐芽鳳剪可容留
短焰粉蛾無事犯輕紗月含丹桂何妨白火燎雙

芝更似霞若個深閨千里別佳人拜罷却教遮

前題

毛袞

一點芳心真未真擬將消息叩花神漸成綺席嬌
饒態忽作金缸爛熳春蟬翅髮邊擬可帶守官額

上未曾親如何慣向穠時落惆悵中宵不寐人補仲

年不及子淵而殒落句竟成詩識悲夫

前題

許世忠

冷背銀屏吐焰紅難分啼笑恨無窮開臨卷額蘭
缸靜落向碁聲画閣空此夜好音先喜鵲明朝芳
信待征鴻粉蛾浪學花間蝶不逐勾芒犯祝融

前題

九來詩凡一十二首各賦一事今錄二首

葉奕苞

六街漏永九華明烟散餘花不夜城葉葉自當依
火樹枝枝欲上擬金莖羊車到處憑先報羯鼓催

時未有名長信獨眠和淚看從他剪斷又心生宮燈

數聲款乃月朦朧溲沱寒缸點點紅出水却疑菡

萼影當秋應入蓼花叢老妻慣卜來朝雨穉子周

遮別浦風何似客星桐渚上不妨明滅亂流中漁燈

梅遊雜詠

是集詩凡六十四首錄二十六首

胥江曉發

釋道源

兩岸人烟密風檣趁曉行水昏蓬葉濶月落柂樓

明撥棹驚漁夢爲歌動客情橫塘何處是野店有
雞鳴

前題

陳瑚

尚憶前生夢曾爲避地行殘星入市亂初日女墻
明花木能春色山川不世情只今江上路但有怒
蛙鳴

前題

費參

夾岸雞聲曉孤帆夢裏行江風綠艇發烟月炤霜
明枕畔留寒響吟邊減睡情橫塘猶似舊人語雜
鐘鳴

前題

毛袞

花事西峰早衝星挈伴行嚴城柝已靜宿艇火猶
明松色山山合梅風處處迎南塘今在望春島弄
春鳴

前題

毛袞

江色籠烟碧輕風促棹行卷簾山半吐掛席水初
明忽振探春興同深吊古情梅花如有待故遣曉
鶯鳴

虎山橋夜泊

陳瑚

爲愛湖山好先維薄暮舟巒腰趨衆脊掩腹吐群

二十六
流筇杖村村返香雲戶戶浮臨高一遠眺幽討不
勝搜

前題

費參

香國知非遠因橋暫繫舟榜人依岸語磻道引溪
流日落村烟暮山空夜色浮明晨理筇竹好向萬
峰搜

前題

毛褒

似此湖山勝焉能不繫舟絲虹凌絕澗白練臥中
流蓬底漁歌出波光增影浮坐來無限好烟月自
悠悠

前題

毛褒

尋春不覺晚擇勝一維舟有地山皆踞無風浪亦
流笛聲和月出魚火帶花浮香夢今方覺群峰欲
徧搜

過鄧尉山

陳瑚

珠宮香樹裊茆屋亂雲堆薄醉誰家子高歌何處
來奇觀千日少勝事一花該莫吊中興將荒祠炤
翠苔

登七十二峰閣

陳瑚

凭欄聊約略七十二高峰影入太湖水不知更幾

重風疑吹掌動霧忽染眉濃對此生微悟乾坤曠
在胸

前題

費參

一閣安山頂憑欄面面峰翠微深處合青靄坐來
重烟接湖光繞晴連樹色濃芙蓉七十二收拾到
余胸

前題

毛袞

諸峰多邃閣獨此聚諸峰遠近如相接高低不計
重湖平波欲撼樹老翠偏濃始得憑虛檻斜陽已
下春

前題

毛袞

枕流安傑閣遠近拱層峰檻外雲千疊磯前雪幾
重帆隨飛影沒浪逐炊烟濃舒嘯頻呼酒長風任
袒胸

虎丘坐月

釋道源

已了看花事來過海湧峰梵香飄傑閣月影出高
松金虎空存石吳鈎莫見鋒米囊加納外欲聽曉
來鐘

前題

陳瑚

踏遍湖頭雪來尋寺裏峰酒帘知曲徑茶幔見高

松客有攜絲管僧無鬪箭鋒坐深歸路白明月一聲鐘

前題

顧夢麟

何年從海湧增勢在高峰光浸寺心月影來厓上
松千人但歌管一石有機鋒不信寒山近君聽夜
半鐘

前題

錢嘏

行到虎溪晚山低不見峰月清雲裏樹風冷澗邊
松石骨埋金虎池光發劍鋒夜深絲管靜搖落一
聲鐘

雨窓卽事

陳瑚

籃輿香細細竹屋響淙淙雨急鳥蹲樹人歸花在
牕遙情依鄧尉餘夢入吳江濟勝非無具春風未
可雙

前題

費參

澗流懸樹杪幽响自淙淙况復花間雨來敲僧舍
牕離憂生岸草客夢遶湘江簾捲寒烟裏飛飛燕
影雙

前題

錢嘏

連朝登陟倦靜喜雨淙淙碧草齊春徑新鶯滑曉

臆勝遊思鄧尉早發憶胥江門外來知己先聽展
幾雙

家家春鳥鳴

陳瑚

鳥亦何多事衝烟處處聲枕高齊覺曙門掩盡知
晴斷續隨芳樹愁歡送落英感茲求友意為爾賦
嚶鳴

前題

費參

好鳥因時轉村村巧作聲多情隨去住懷我任陰
晴乍別聞芳樹閒啼到落英春風遍林薄百舌正
堪鳴

前題

錢嘏

東風吹綠暗有鳥盡爭聲花落家家雨風和處處
晴隔林喧返炤深樹啄殘英到處須聽遍春歸恐
倦鳴

前題

毛褒

處處枝頭鳥春來別樣聲王孫間簫管里巷別陰
晴引類過芳樹呼雛啄曉英行人莫駐聽前路有
同鳴

一片花飛減却春

毛褒

春與花相倚花飛不待春縱然多在樹無奈早沾

塵日馭催青帝芝田度洛神司勳若相見已恨失
芳辰

泉遊雜詠

有序 是集詩凡四十首錄一十四首

三春既曠百卉具殷迨至孟夏快雨彌旬
泉飛樹杪余與確庵陳子集匏庵朱子書
畫舫中拂水乘風開樽遙對欣然賈勇遂
同往方塔寺招石林上人出北門倩籃輿
過小澗入桃源選石分坐容與徘徊陳子
叩桃源緣起實莫知其所自石公因述五
十年前猶見桃花夾澗紅雨繽紛邑人往

往脩稷於此流觴題壁不亞蘭亭一僧結
庵泉上顏曰妙音木衣綈繡土被朱紫香
雲隱天花雨灑地士女來遊晴雨無間四
月八日俗尚浴佛鮮車怒馬溢谷空城自
卯至酉車不能旋馬不能驟兵荒以來僧
徒絕影香積無烟惟見如來露坐泉聲咽
石已耳歷級而上至白鱗洞洞啣半壁冬
夏滴瀝不盈不涸絕無回回洶洶之狀與
如也旁有崩石如屋萬曆間一僧晝卧其
下夢佛燈火發驚寤疾走未至佛前其臥

具已粉碎石下西偏有西相大士塑工精
巧今殿宇半傾相好儼然墻外水聲如雷
蓋石屋也相傳太公辟紂居之洞中老僧
導路下坡坡路已沒呼輿人舁石碁布猿
臂以渡水勢如游龍莫之能測方蹲凸處
倏又奔突澶漫衣履都濕不能久留再渡
一嶺相與捫蘿引葛從四高僧墓傍至破
龍澗非但深邃層疊迥異桃源且夕陽下
春烟光四合而鐘聲梵唄縹緲於初篁古
檜之間幾不識廬山真面目矣夜宿興福

寺寺多詩僧秉燭引余輩坐空心潭側烹
茶煮笋論詩品画画中見曰補極稱連珠
洞予遊展所未曾也忽忽不能寐未幾初
日又炤高林矣亟振衣起由萬松書院飛
跨幾凹見一澗從望海墩折北而下多巨
石色如積墨泉鋪石面細白如貫珠旣入
洞兩巨石層疊如獰龍張口上下相隔丈
來地方廣數丈可容百人俯入見石頂中
穿一穴徑輪五尺餘水從中懸如明珠分
綴綿聯不斷日色倒射五采陸離晴搖目

眩令人撫掌狂叫泉飛谷應疑覆疑壓爲
之肌粟又北折爲五丈石石勢嵯峨伯石
屋而伸劔門水勢洶湧可與秦坡頡頏惜
僕痛馬瘖日將逮昏不能磅礴其上心猶
憑而未攄姑揚摧以詠之俟異日之續遊
隱湖毛晉識

桃源澗

毛晉

出郭未云遠流泉夾道迎桃花無舊態黃鳥有新
聲樵子眠獅坐蜂兒破鶴楹老僧談往昔水亦作
悲鳴

前題

顧夢麟

一城秦漢隔咫尺是桃源澗挾兩方怒石經泉欲
翻偶於危處咽忽到寂時喧翁仲疑人立終年聽
不言

前題

嚴陵秋

泉飛知寺近寂寂少人迎石蘚桃花色林烟杜宇
聲低眉瞻寶相病衲倚丹檻香積塵封久疎鐘不
復鳴

白蟾洞

釋道源

桃源北上衝雲深夏初草木多新陰舉頭日月似

激箭會意山水餘清音去來自若見游鹿綿蠻不
斷聞鳴禽碧潭一勺深無底千年白蟾莫敢侵崩
石之傍立蓮宇西來妙相塗黃金與僧茶話間有
理如何一芥投鋒鉞漫誇濟勝捷於鳥台藤六尺
扶我尋

前題

顧夢麟

不信蒼厓壁曾因白鱗開雨常簷上落泉豈地中
來瓢洗高懸樹瓶攜濕帶苔時逢老僧過趺影坐
徘徊

石屋

毛晉

幼聞長者言西湖名尚父既長讀紀聞石空凡十
所石空即石屋湖山竝太古洋洋東海表寧與石
城伍北郭有石城為吳王養馬處憑吊陟重岡泉聲正跋扈矯
矯一若龍咆哮一若虎滿耳激秋聲不知日卓午

前題

釋道源

石屋藏虞峰尋之問山父指點東嶺傍絕壑即其
所泠泠水聲麓纍纍石色古上下杉檜交頓失赤
日午一洞足加趺何用多屋宇

前題

陳瑚

吾聞古三吳禹貢揚州域胡為鳥目山乃寓鷹揚

跡世人聞見恒好奇往往山水緣飾之仲宣登樓
 非一所昭明讀書遍天涯見亦不足信聞亦不必
 疑但取前人風能為後世師只今石屋清泉在隱
 者孤踪係千載芒鞋藤杖共招尋青山不用一錢
 買泉流石屋東紆回滴瀝懸長空泉流石屋西盤
 盪洄泮無端倪泉流石屋北濺濺白玉髮可沐泉
 流石屋南灑灑明珠手可探吾將坐其中枕其側
 穴土為銼煮石為糧可以忘年而永夕愚哉尚子
 平此願何時畢君不見石屋之水深復深洗盡人
 間萬古心

破龍澗

毛晉

重上籃輿牛晚天倉庚猶嘒紫光烟家家墓上消
 松翠處處籬邊采茵鮮救虎何人重建閣破龍今
 日又聽泉年來霜儉山厨閉惟有論詩雪柏前

前題

陳瑚

龍來澗水腥龍去澗波冷長松夾磬音明燈見幡
 影有僧導我入花木非人境論詩鬪槍旗月落燭
 兼秉妙香群動息悠然發深省微聞門外喧彌覺
 山中靜

拂水巖

顧夢麟

赴壑流泉性斯巖獨未然逆風吹作雨低日射為
烟殿古寨惟濕橋危路履偏下方看不見人物在
諸天

前題

陳瑚

停橈凝睇翠芙蓉宜側宜橫淡復濃貪望鶴來龜
去處酒闌重上最高峰

秦坡

顧夢麟

迢遞神鞭石虞山最向西好尋陂偃仰盡得水高
低琴筑層層變魚龍滾滾迷無因見毛女歸路鳥
空啼

前題

陳瑚

策杖烟光裏秦坡一綫明崩雲山有語屑雨樹無
聲翠壁環麇鹿青松窺鼠鼯日斜遊未了回首動
離情

和白香山我年五十七

是集詩凡五十四
首錄一十六首

毛晉

我年五十七停辛洵非少養志志未伸遣累累未
了幽獨時自訟慙深德涼小高跼而厚踏織鱗潛
瓦沼同庚幾兄弟整翮雲端矯丹陛詔煌煌赤幢
香渺渺惟余卧衡茅長夜不知曉芝菌任榮枯彭

三十一
殤任壽夭華嶽挺喬松池塘被荒篠齊點山水色
識者付命表

同和

彭行先

我年五十七遺民自稱許青松社裏人獨樹軒中
主寧求屈蠖伸庶無吞葉苦風塵方瀕洞眈安匪
懷土
我年五十七習隱歎衰遲繫爾西笑人若若與纍
纍中原正繹騷偷息東南維敢云狂進取差擬狷
不爲慎持媿矯立棲約伴虛羸悠悠名利路有客
車載脂得喪摧心魂氣槩長乏饑誰歟脫鞮韉海

天任所之蕩滌抒情志卓犖脩爲期願言質同心
伊人在其湄

同和

蔣棻

我年五十七塵緣亦覺少靈運心不雜向平累未
了一女方待字一兒猶稚小等之縱壑鱗圉圉慚
離沼門庭雖寂寂志意仍矯矯涼風靜火雲虛堂
生杳渺攬衣起徘徊澹澹星河曉良貴不爲賤踰
艾不爲天叢蘭吐芳芽篔簹發新篠蕪詠繪清真
匪同自矜表

同和

孫永祚

我年五十七更閱知多少犀角方寄人幼惠粗了
了處恐下流污出恐遠志小有官久不宦有國已
成沼本是烟霞人申蟠豈云矯康成塵垢囊擲去
何渺渺載酒玄亭春立雪程門曉著書足千古彭
殤何壽夭清風吹高梧蒼雪灑弱篠莫笑典公狂
意氣凌霞表

同和

嚴炳

我年五十七良緣不為少人忙吾獨閒家貧累已
了廣土不知大丈夫室不知小營巢過槍榆滌視臨
池沼混迹闌闌間雞群翮矯矯飛仙笑守尸空王
引縹緲塔影入樓明山光逗牕曉菊圃有餘蔬茹
美擷其天蕉林下醍醐滴滴傲綠篠晚涼一散步
孤情上雲表

同和

薛案

我年五十七抗志薄楊許攝生非形骸叅禪離賓
主但解山水樂不識貧賤苦慙慙方自誇男子產
中土

我年五十七墮地已太遲何為軒皇世六相塚纍
纍自傷居叔季事事等繫維安能席豐腴袖手旁
觀為所以全盛日身甘狎眾羸咄咄兵火間寧復

三十八
希膏腴不織幸免寒不耕幸免飢參此無用質造
化終私之目前猶忝生不啻偃佺期寄語齊年侶
淡宕江湖湄

同和

楊補

我年五十七衰颯已如許溯往悟全非浮生笑誰
主望道不知學有身酬衆苦深慚田舍翁穠菘事
膏土

我年五十七世棄安拙遲不見彼苦李遺實常纍
纍聖化敦五倫亂世弛四維貧乃士之常奉訓有
不爲虎兕健遭縛鸞鴻保世羸出門卽太行摧車

不復脂詠詩懷古人樂我衡門饑未能負藥餌名
山任所之惆悵九垓遊曠蕩西海期聊同焦孝然
小隱河之湄

我年五十七來日知多少只今便休去世事那可
了達觀四壁廣跼踏天地小困頓轅下駒何如魚
在沼蹇劣安吾分詎曰與世矯茲冬盛陰氣冰雪
白浩渺吾生一陽候擁被山月曉天地呈本根草
木見壽夭萬象正湛寂寒光炤松篠肅肅發深省
和公言句表

同和

李模

我年五十七頭顱遂如許瑟居同旅人問影誰爲
主愁來多慨慷忍辱忘憂苦終期解塵纓坐彼蓮
華土

再和

我年五十七取世無多許媒久謝蹇脩卜寧問季
主不圖食蔗甘那避習蓼苦匪敢云善藏身物同
委土

同和

方夏

我年五十七頭顱已如許所幸無繫維得爲風月
主不學仙蜂勞豈知蓼蟲苦自笑七尺軀胡爲寄

茲土

我年五十七筋力衰且遲澤畔時行吟被髮疑湘
纍皇綱自解紐舉世無能維余本狷者流志有所
不爲落落守窮巷神沮形亦羸獨醒觀衆醉臨水
然蛭脂吁嗟十年來難忍如旦飢天地豈不廣蹙
蹙靡所之幽谷久困折丹霄駕何期安得險阻平
鼓柁遵湖湄

同和

釋玄弼

我年五十七興衰見不少夢幻已知非雄心尚未
了飲啄沙磧間江湖意不小丹桂植天衢青蓮耀

芳沼何以千尋檜根古枝猶矯舉足崑崙顛扶桑
雲渺渺望月指星明聞雞樂起曉思以抒我懷敢
云百歲天撫琴仰高山登樓俯弱篠擊楫祖述歌
白鶴翔雲表

破山禪院逢潛在夜話次日上巳靜嶼移樽

寺前澗上同賦

楊補

故人老去多零落南北天涯會晤艱察院我來分
芋火籃輿君亦度春山七年離緒禪燈側三月風
光上巳間勝地佳辰良會并飛花莫遣送人還

前題

毛晉

時非上巳不為節用元人句入寺方知正及辰七載離
情淹話舊一宵細雨著花新采蘭別徑攜筐遠飲
馬前溪洗石頻豈有攢眉回去客匏樽早向竹邊
陳

前題

釋契德

相逢三月日重三谷口桃花帶雨酣磻戶寂寥新
火候籃輿先後度城南當年禊事風猶在此日林
泉好共探深幸宗雷到空谷愧無支遁接清談

次曰補韻

王咸

亂離幾度忘脩禊况隔烟波會復艱正惜幽期過

令節不知良晤在名山娟娟潭影銜杯裏冉冉風
光覓句間好景留人歸未得片帆江上又空還

余正往故里
訪日補不值

次潛在韻

王咸

自昔風光惟上巳衰遲尤為惜茲辰鶯聲絕似絃
聲好花氣渾隨酒氣新可意溪山逢處少傷心時
序別來頻采蘭又是春三月欲寄離愁未忍陳

次潛在韻

袁默

恰逢初日過高林勝侶相邀正此辰燕語呢喃疑
道舊山光紺綠似添新循溪問石風來緩坐樹談

玄促雨頻薄暮掛帆何處去湖濱有榻傍花陳

次潛在韻

錢嘏

松杉自作深春色緇素相逢上巳辰亂後河陽花
似舊醒來彭澤柳偏新輕雲帶雨因風散棲鳥驚
人換樹頻常尉詩中堪坐卧一杯酒茗澗邊陳

次潛在韻

馬弘道

修禊出遊饒韻事快心老友會茲辰行厨借具吟

懷暢

聞靜嶼移
尊欄上

摘茗分嘗乞火新却恨追踪逢雨

阻

是日阻雨
不果同遊

懸知燕笑入山頻浮生聚首須酌

轉眼相看迹已陳

春盡日冒雨尋山 有序

錢 嘏

確庵夫子偕昭陽李映碧玉峰葉白泉兩
 先生過隱湖子謙子莊從焉隱湖主人開
 汲古閣出其藏書及唐宋人墨跡縱觀竟
 日明日主人載酒放舟將探鳥目諸勝中
 流雨大作泊問漁莊薄暮抵吾谷冒雨坐
 新綠中復移舟宿錦峰下又明日雨霽買
 筍輿登劔門觀拂水上望海墩望大江入
 海處日下春還舟中從湖田而歸同賦詩
 以紀其勝時乙未之春盡日也

到山春水盡傍柳繫輕槎綠暗中林雨紅流滿澗
 花城根雙塔小雲際一江斜回首南湖畔烟深五
 柳家

次和 去歲曾與公雨對長觀山水
 葉國華

柳風翻麥浪暮雨送春槎石面皆流水山坳聚落
 花晚鐘蕭寺遠殘照劔門斜興盡迴雙槳詩成已
 到家

同和
 陳朝典

何處春歸路青山過客槎暖風旋細草微雨帶殘
 花燕羽穿簾澀鶯聲坐樹斜杖頭一瓢酒老我樂

無家

同和

陳帆

幸留春一日同泛雨中槎嫩劇懸崖笋香烹落澗
花城雲鎖愁翠山雨壓眉斜隔樹聞鶯早淹留醉
酒家

同和

陳遜

春欲將愁去追隨泛雨槎鳥蹲烟外樹泉汲澗中
花暗霧侵簾潤濃雲護嶺斜漁燈明滅處依約兩
三家

同和

陳邀

留春春不住及此泛春槎楓老重添綠藤殘尚帶
花亂雲凝岫遠細雨入簾斜飲盡停帆影前村覓
酒家

同和

毛晉

飄忽春風駛忙移帶雨槎柳條泣別淚藤蔓落殘
花烟合連峰暗雲歸吐樹斜慙懃燒短燭鐘曉到
山家

同和

毛表

此夕愁春去追隨泛小槎屐香新溼翠巢綴啄殘
花山徑雲深沒泉源雨後斜鐘聲渺何處依約近

僧家

同和

毛 泉

良辰春九十少長集浮槎岸綠侵裾草溪紅別樹

花雕弓驚雨亂

是日有兵渡河

席帽醉風斜止宿山橋下

燈明燕子家

丙申人日過隱湖

陳 瑚

抱籍囊詩過草堂蹴天高浪動湖光春風鷗鳥幽

人瀨夜雪梅花處士莊顏色看來還似月鬢毛別

後各如霜借書曾有荊州約早擬明朝載滿航

留次和

馮 班

秫酒吳羹集草堂紛紛霰雪滯春光庭梅芬馥揚

州句烟樹蕭疎五柳莊且喜琴書銷歲月共看容

鬢歷風霜相過相聚俱堪畫草色平湖著野航

同和

錢 嘏

百里孤帆過草堂輕寒細雨變春光湖頭楊柳烟

為樹月下梅花雪作莊知己笑拚千日醉荒雞寒

咽五更霜因思澤畔行吟客未得青山泥一航

人日雪中定遠見訪志喜

毛 晉

雪片隨君入草堂同開笑口數年光花溪問字分

匡坐柳浪尋春泛羽觴亂後頻驚節候改老來偏

恨別離長兒童未解余懷抱倩著鴻木

求符籙
鎮堂中

次韻奉酬

馮

跨水依山架小堂一編當日借餘光雲添樹

疑画月炤松堦夜引觴夢裏童心銷已盡愁中白

髮可勝長故人零落遺文在好為花溪炷板香花溪

先師山齋溪名同
子晉讀書其上

次和

陳瑚

高會相逢君子堂前人洪筆見輝光屏有文山書
忠孝二字

客無苛禮容三拜主有餘歡引百觴殘凍未消花

事晚好春初度鳥聲長步虛法曲能成否昨夜曾

焚看籙香

從三峰泛隱湖訪潛在

釋炤影

閒尋海上佳山水谷口忻逢鄭子真百畝繞門留

漢地一津通路引漁人秘書連屋搖雲幌玉樹盈

堦笑曉春十載神交初識面空庭花鳥亦相親

丙申春暮邁公山房復遇潛在止宿

楊補

去年泉畔逢脩禊邂逅今年復礪濱佛火繩牀如

昔夜風花泥絮惜殘春探尋不厭頻來地離合偏

恨別離長兒童未解余懷抱倩著鴻衣燕辦香兒次

次韻奉酬

馮班

跨水依山架小堂一編當日借餘光雲添樹色春
疑画月炤松堦夜引觴夢裏童心銷已盡愁中白
髮可勝長故人零落遺文在好為花溪炷板香花溪

先師山齋溪名同
子晉讀書其上

次和

陳瑚

高會相逢君子堂前人洪筆見輝光屏有文山書
忠孝二字
客無苛禮容三拜主有餘歡引百觴殘凍未消花

事晚好春初度鳥聲長步虛法曲能成否昨夜曾
焚看籙香

從三峰泛隱湖訪潛在

釋炤影

閒尋海上佳山水谷口忻逢鄭子真百畝繞門留
漢地一津通路引漁人秘書連屋搖雲幌玉樹盈
堦笑曉春十載神交初識面空庭花鳥亦相親
丙申春暮邁公山房復遇潛在止宿

楊補

去年泉畔逢脩禊邂逅今年復礪濱佛火繩牀如
昔夜風花泥絮惜殘春探尋不厭頻來地離合偏

傷老去人一度中宵聞梵唱一番悽愴感前因

次和

釋契德

二君法社論交久邂逅重於古礪濱禪榻共眠今
夕雨花林還憶去年春筍香竹院堪留客蝶栩栩松
窗似戀人莫笑山家滋味薄箸頭拈出總清因

午月二日登君山

錢嘏

緯繡河山目未窮關心往事涕無從英雄殘骨生
新草公子孤墳失舊封滿地塵沙驚鼓角一江波
浪卧魚龍當年百戰功安在回首空城恨幾重

次和

瞿有仲

殘山剩水恨無窮東北烽烟誰適從寒蕨祇知商
雨露春風已換漢提封浮來雙岫空蹲虎直下長
江不渡龍戰血只今流未盡兼天波浪更重重

同和

費參

行行豈為泣途窮底事無端涕淚從暴骨荒烟青
草塚小村殘炤白雲封風高戰壘聞嘶馬浪激寒
江起卧龍不盡興亡今古恨芙蓉城外楚山重

同和

毛晉

楚水吳山望不窮升高舒嘯又相從石梁草覆當
年塚鐵鎖塵埋舊日封帷幄分張入塞馬旌旗飛

渡祭江龍

騎射競渡紀是日所見

大夫公子魂來些唳咽風

濤幾萬重

閨端陽前一日偕潛在梅仙拜季子墓和壁

間陳張正見韻

是集詩凡七首錄四首

陳瑚

季子空祠廟風流自不移山如相讓色樹老獨醒

枝旁有奇樹能醒人醉

地脉廻申浦天心愛孔碑

十字碑雷震不壞

班荆齊酌酒此意許誰知

同和

錢嘏

何處延陵墓輕舟江岸移橋通龍渡水松老鶴巢

枝生死千金劍滄桑十字碑至今辭讓德草木亦

能知

同和

毛晉

窈窕尋申浦潮迴橋影移地荒僧避席檐露雀遷

枝神道犁耕水空堂草掩碑嗚呼三片石

一在江陰西郊

一在毘陵城中一在雲陽驛前真贗有誰知

同和

費參

延陵一片石歲月幾更移草沒眠牛地松風掛劍

枝依稀前代跡斷續古人碑多少蠅營者蚩蚩誰

復知

八月上弦同潛在寶伯遊華山宿汰法師影
堂呈含光上人
楊補

蓮花蓮子夙心期自笑聞鐘失往時玉面阿難今
亦老白頭玄度共來遲講堂松響清風調梵閣花
香舊雨思雲裏雙峰看獨峙一燈真系更誰持

前題

毛晉

洞口聽鶯憶往年重來樓閣更歸然到門彈指瞻
先範入室傳燈禮後賢滿院香風飄晚磬半山斜
日訪幽泉舟中片月隨南北約略重陽采菊天

前題

馮武

叅差樓閣繞千峰蓮子巖前得放筇古像離塵松
影淨曉牕含露桂香濃藤蘿久護幽人筆山石多
趙凡夫
父子泉石長拋隱士踪旁有朱白
民精舍名勝初登殊未
遍後遊寧厭昔來重

過徐元歎落木庵

毛晉

十年離舊榻賀九山又重登山翠連村合花香繞
屋凝尋僧過略約呼酒洗癭藤周子同題處苔封
厚幾層昔年同仲榮相訪
不值留題壁間

前題

楊補

卜築天池畔心期淨六塵當年磨鏡客此日灌園

四十九
人且對青山好休驚白髮新石叢金粟吐俱作染
香身

前題

馮武

高風遠人境古道入桑麻樹隱前朝寺山圍處士
家松扉開礪曲藤杖策雲斜偶問人間世無言只
自嗟

八月初十夜同登虎丘月色如水寂無一人

此時此地平生所未遇也 楊補

森森林壑淨纖塵臺殿參差霽色新誰料虎丘今
夜月千人石上更無人

次日補韻

毛晉

林外烟飛似起塵晴空寥亮雁聲新點頭孤立中
庭月同調惟余三兩人

前題

毛晉

曉發天池路宵興又劔池蛩吟初斷跡鳥夢久恬
枝漸覺鈴聲厲聊隨臺影移空山孤落月今夜幾
人知

前題

馮武

秋風入古寺月色待遊人松檜經今雨絃歌起劫
塵空庭移藻苻梵宇接星辰慷慨休相訝閒來是

逸民

一片冰霜影紛紛入寺門露寒絲管散獨自炤山根

共知來步月誰惜月粼粼不見千人石相看有幾人

丙申中秋日耕樓玩月

開筵依北渚留月駐南樓坐酌冰壺水同乘雪夜舟山搖湖氣白樹接海風秋醉客饒孤興臨池自拍浮

前題

錢嘏

盡道中秋好新開萬里晴可知今夜月原是舊時明天帶星河動雲停碧落輕南樓賒酒與金谷句難成

前題

陳遜

四野人烟暮千山草木秋淡雲浮遠塔古月浸危樓僧定鐘聲斷溪明霧氣收臨風一卮酒相對自消愁

前題

毛晉

今夕家家月誰家月最明雲開臨野濶水漲接天平白雁生霜色蒼蘆起泛聲不傾千斛酒何以慰

遙情

前題

張溯顏

宿霧長空掃樓頭月正圓雲明秋夜水風靜露深
天不淺胡牀興是夕外忘懷絳帳前時確師難勝
金谷殘草率早成篇與會

與與公別十年矣舟過荻溪忽相遇於退山
齋中開尊話舊啼笑間雜繼以長句

毛晉

十載離愁傾十斛茫然空谷響寥寥家山亂後青
仍在客鬢尊前白不饒萬樹梅花思掩嶺半輪殘

月度溪橋明朝掛席陽城湖名水柳眼凄迷一望遙

奉和

王咸

飄零吾道不逢辰客路春風幾度新午夜憶君惟
有夢此生好我更何人久知霧豹遵時老屢聽鵬
鷗振羽頻畢竟故人多古處一回相見一回親

小重陽日載菊過隱湖訪汲古主人舟中對

菊漫賦

釋寂覺

中峰分袂又經旬特買輕舟訪隱淪不畏風寒行
路遠為尋玄度得相親

同賦

釋炤瓊

載得黃花過隱湖
輕風破浪一帆孤
莫嫌秋色從來淡
也供書齋伴玉壺
凭舷捲幙望虞山
積翠遙迎圖畫間
高閣縹緗藏萬卷
吟餘何事可相關

次韻奉酬

毛晉

中秋喝月已三旬
正擬花中洽隱淪
忽載秋芬慰岑寂
倚闌凝坐影交親
一船花影炤平湖
入座相看興不孤
方訝水村無別供
楸枰藤杖蜀山壺
淡人如菊出雲山
消日秋光百里間
千頃蘆花數

行雁高吟何事可相關

九月望夜集此靜坐燈下看菊

顧湄

勝氣高齋爽黃花
出幾枝送因僧更好吟
待客偏遲晚節霜三逕
寒香月一帷揮盃殊未已
草草和新詩

前題

毛表

秋齋正寥寂叢菊列牕前
月白和枝淡燈紅與色鮮
坐深香更遠夜靜韻加全
瑟瑟霜華結持盃思渺然

前題

毛 泉

夜色秋來好南樓一望餘風吹水面月燈炤粉墻
花黯淡雲歸樹參差雁落沙伊人渺何處白露接
蒹葭

丁酉上巳遊白鶴峰

是集詩凡八首錄四首

錢 嘏

踏遍荒苔路欲窮深林轉處忽奇峰人行樹杪凌
孤巘石墮雲端壓萬松江勢北來連海氣山形西
去絕人踪籃輿欲下頻回首何日重來策短筇

次韻贈潛在

黃 滌

多君新詠似芙蓉画出西來秀絕峰紅袖相將翻
芍藥青帘高颺傍喬松欹斜老屋雙跣影搖蕩孤
帆七里踪霜葉重來豈敢後預誇身健未須筇

前題

馮 武

剪棘披荆力已窮貪奇猶上最高峰到頭石盡疑
山盡回首來踪失去踪天外烟波同咫尺雲間鐘
磬入楸松春風吹向繁華地寂寞巖前自放筇

前題

毛 表

崖豁泉聲響半空穿林又得一奇峰山猿采果懸
當澗社燕將雛過別松窈窕還疑無去境傾圯何

處認來踪相羊不覺斜陽下人影參差亂瘦筇

寒食後三日同潛在汎湖 錢 嘏

十幅輕帆半未開鏡中天地獨徘徊湖光直欲浮
山去塔影橫將入座來柳帶夕陽棲倦鳥花流春
水積荒苔一聲漁笛烟波裏知是前村買酒回

次和 毛 袞

展墓歸來午色開輕舟蕩漾故淹徊堤邊沽酒征
夫去波際看山燕子來短短蘆芽齊似剪垂垂柳
帶碧于苔霞明水面堪留戀隨意橫拋莫遠回

白椎庵法會 有序

歲維丁酉月屆壬寅遐邇歸依緇素咸集
恭迎善財香像於古鶴澗邊奉誦雜華梵
文於白椎庵裏一人敷講金剛三友施食
談口設壇乎哉生明解制乎哉生魄維時
香霧蔽天繡幡拂地雨花璀璨帶雪片散
入雲端法樂悠揚互鳥語流傳溪曲松間
藤杖徐行南極老人石上蒲團端坐西方
淨侶斯真百年重續之燈千載希逢之席
也同賦禹錫七言合作雄飛三拜隱湖毛
袞述

倡

徐學孟

為渡群迷作海航隨施講席在經堂華嚴方寂鐘
魚响般若旋開日月光地震三千風不斷花零萬
億雨常忙見聞皆廣伊誰力自慶躬逢大覺王

和

馬弘道

喜聞大願泛慈航緇素皈心聚雁堂課演貫華重
聽法坐分寶葉復生光雲深鐘磬音偏寂風定旛
旛影不忙暫得春閒隨喜徧衰遲早已向空王

同和

陸貽燕

為訪鳧溪棹野航恰逢蓮社入西堂燈前清磬醒

殘夢竹外疎鐘散曉光密諦根塵原寂寂幻空色
相本忙忙願分半偈尋真性時伴高僧禮藥王

同和

毛晉

帶雪平移恰受航遙瞻香藹護溪堂肯來鶴澗南
詢跡重現鳧溪撥棹光一縷能薰天外杳千燈寧

鬪世間忙

元宵列炬
焰出松顛

自從丁亥雙輪轉

丁亥年蒼
雪汰如二

師分講大鈔
于中峯華山又見中興禮法王

同和

釋寂覺

愛河準擬筏為航選佛場中闢講堂戴笠穿雲尋
粲可安心立雪效神光繩床伏虎心能善石鉢調

龍意豈忙末法律梁誰負荷願弘竺典侍空王

同和

釋行潔

生從欲海乞慈航白社斯歸如是堂法雨每隨春
雨潤香雲時帶曉雲光靜聞深樹鶯聲澀笑指空
庭蝶影忙出世自能修淨業乾坤老我侍醫王

同和

釋炤霽

蒼茫幻海具浮航脫跡風塵會講堂名士已招陶
栗里高僧復見魯靈光堦前野鶴和音雅溪下游
魚逐影忙寂寂春庭晴晝永折松閒憇論心王

同和

釋炤瓊

鷲嶺梯高法海航從來覺路自堂堂經筵豎拂開
心地香蠟交輝減月光止觀得閒啼鳥寂尋梅隨
意放筇忙六時課罷無他事且向幽牕展墨王

同和

釋炤行

法海能將一葦航彌天花雨散雲堂閒翻貝葉消
蓮漏靜味玄言徹曙光鐘渡半塘人影寂春來千
樹鳥音忙而今白社堪招隱裹足青山禮願王

同和

釋炤萍

桃源柳市接湖航襍被同攜到雁堂進影雙林聞
法乳振衣初地覲珠光梅香淡淡雲中淨蝶夢飄

飄花底忙最是緒言談未了由來百谷海為王

丁酉仲秋喜子晉同公郎華伯奏叔黼季重

過傲廬

林古度

金陵還是舊皇都君忽重來自海虞知向青編長

作蠹欣從丹穴遠將雛秋同朔漠聲加肅月在中

華影若孤莫問年庚耆與耄吾儕難老此頭顱

別那子先生十有七年秋日過訪快閣藏書

方池烟柳茫不可問但見兵伍盤踞中存

老屋令孫課鬢髻八九而已握手話舊欣

慨交心見貽瑤篇次韵奉答

毛晉

文章流別邈三都千里重來訪摯虞繞屋酬酬喧

戍卒破牕風雨課村雛播遷研席身靡定詮次湖

山興不孤契濶廿年如夢寐彌襟歎息撫霜顱

八月九日丁齒生招遊烏龍潭湄園即席同

賦

毛晉

便得秋光好難逢主客閒不聞車蹠躩惟有鳥間

關快閣虛生影空欄淡入山頻年悲浪跡莫漫趁

潮還

中秋後遲潛在過鶴林

釋通門

五十八
迢遞南徐路烟霞有舊盟欣持片帆影深話半秋
情山爽收雲氣江空度雁聲寺門閒佇立松月上
初更

久滯白門不果鶴林之遊次韵奉訓

毛晉

咫尺逢僧處幽篁覆石盟分明兩地月同照一宵
情露白蒹葭影吟殘蟋蟀聲夢回黃鶴遠城角已
三更

丁酉秋客白門晤子晉賦贈 范又蠶

著述名高海內傳功深歲序變桑田史能精較前

人誤詩却仍宗昔代編鼓棹載書來泛月抱琴尋
友聽揮弦因知頭白心尤苦恥與楊雄論草玄

小范贈余長句兼示釣吟龍山漳湖諸刻歸

而讀之次韻奉訓 毛晉

雄心還假賦心傳讀罷多君闢研田自有湖山供
筆陣還欣廬舍把茆編莫愁湖上鶯相和邀笛闌
邊月正弦他日漳濱遙理棹釣磯吟客髮猶玄

丁酉重九日登雙蓮閣 馮班

極目平疇濶南山望裏賒香風吹早稻落葉露村
家有酒思元亮裁文憶孟嘉明年各健在莫厭插

黃花

次和

毛晉

空閣臨空野
牕中山影賒
偶安小佛座
儼入老僧家
方破雲猶卷
初凋柳更嘉
閒遊了無累
計日共栽花

同和

毛表

霽色開烟閣
凭欄極目賒
全山列半榻
一水抱千家
小白溪魚美
輕紅柿葉嘉
登臯試舒嘯
驚落隔林花

鶴林小集 有序

令屆小陽月
浮纖影山帶
蒼黃之色樹
含蕭瑟之聲
兼之殘菊偃
籬香臺悠然
多致落葉滿
逕竹院闐其
無人斯時也
既喜乳峰老
子藜杖先臨
復快隱湖居
士寶筏隨至
自南自北忘
主忘賓夫豈
預期允為良
晤顧交臂之
非新遂促膝
以話舊村廬
隔雞犬之鬧
雲堂發鐘磬
之幽秉燭承
歡開襟遲寐
古人所謂聞
君尋寂樂清
夜宿招提信
有之矣所愧
和盤托出山
厨乃藜藿是
炊信口吟來
谿藤豈金石
方奏然則壘

吹篴應幸已得石老之佳篇若夫雪和瑤
賡復有待龐公之妙句滄江傳誦寒谷生
春篤千里之故人紀一時之佳興又所聞
與子成二老來往亦風流誠不讓于前人
也

釋通門

冬山霜木落此會豈相期南北皆兄弟盃盤共藿
藜燈青頻炤影菊傲尚開籬一宿雲林寂鐘聲出
嶺遲

次和

釋通雲

木葉霜明候欣逢意外期漫言旋理棹且快共扶

藜坐坐橋邊石行行菊畔籬頻思難聚首步履尚
遲遲

同和

毛晉

旅泊悲寥落相逢若有期一花敷二葉雙燭引孤
藜松月織初上江風冷入籬鬚眉渾似雪握手笑
言遲

與石公別三十餘年握手
相視鬚眉皓然幾不相識

戊戌春日宿雲半居

錢嘏

亂石迷樵徑穿雲得上方夕陽冷窳色樹杪露湖
光幽鳥不停響閒花無定香忘言相對久微月起
蒼茫

前題

瞿師周

結室深雲裏湖光吐樹巔鳥啼千嶺翠僧破一溪
烟草色映人袖山花染客羶可憐松際月依舊故
城邊

前題

毛晉

隔峰分濟勝一日快遊情香霧迷樵路風箏逗鳥
聲笙歌喧廣陌燈火接重城樹杪同僧坐君邊月

倍明

是夜予宿錦峯

前題

馮武

結伴不尋歌舞地閑行信步得僧房水明山外半

天白人語松巔一笑長寂寞荆扉依古樹嶙峋蘚
壁下斜陽下方春色在何處謾謾風聲遶晚香

寄懷潛在居士

釋正岳

避迹惟求學道緣睡鄉佳處只安禪村當僻地堪
忘世日較閒時直似年虞芮儘寬黃犢畔羲皇猶
剩白鷗天炊烟暮合雲峰秀天外遙瞻忍辱仙

次韵奉訓

毛晉

六十餘生愧俗緣春秋佳日擬逃禪青山燕子語
將曉白石松風奏駐年常建持貽悅鳥句永明重
見雨華天

豁公向主三峯今主南屏

開槭拂拂餘芳在那羨羅

浮夢裏仙

師寫老梅一枝寄予

湖南見插秧

是集計詩三十二首錄一十六首

陳瑚

千家村落雨蕭蕭
纔送泥牛急稅徭
境有城狐爭避虎
野無田鼠罷迎猫
鬼妻向夜登床泣
獵火驚人動地燒
天若解憐貧戶口
來朝稂莠盡成苗

代述農家苦次確庵韻

毛晉

村村芒種雨蕭蕭
不住催科無盡徭
餬口幾同窺厠鼠
潛踪休笑過墻猫
烏犍賣去驅兒墾
青草芟來帶土燒
莫道忍饑偏習懶
及辰布穀已成苗

代述農家樂疊前韻

毛晉

闢成蔬圃界緯蕭
且喜輸租免外徭
稚子分秧騎竹馬
老翁罷餉飼雛猫
倦眠桑墅眉皆綠
醉看榴花眼欲燒
頭白未諳朝市夢
天心不吝甫田苗

以插秧詩示潛在潛在連和四章備極其妙

因疊前韻以代述農家之樂然亦如天寶

宮人談開元舊事矣

陳瑚

鶴儀鳩杖髮蕭蕭
共話升平減稅徭
曲曲池塘晴鬪鴨
離離花影晝眠猫
紅鱗味美開牕釣
紫芋香生就地燒
春社始過秋社近
懷新門外見良苗

次韵和農家苦

馮武

數椽懸磬草蕭蕭土著難移莫避徭
罷役歸村猶佩犢無牙侵粟却憎猫
一年秋獲同雲散連歲官租似火燒
誰道江南真樂國幾番辛苦一枝苗

同和

錢嘏

一間蝸舍草蕭蕭連負官家五歲徭
已見驅羊供政虎更思掘鼠事人猫
醉鄉有路誰能到饑火無烟獨自燒
惟有愁腸無雨露朝朝夜夜長新苗

再次韵和農家樂

馮武

斷續村烟接艾蕭傳聞新令減煩徭
深耕鉞鋤勝

霜劍逐鼠驩騮讓跛猫但覺新秧添野綠不知炎
日逼人燒晚凉脱笠呼亞旅狂飲團團藉草苗

同和

錢嘏

遶屋桑麻間蓼蕭但知耕種不知徭
遮門翠柳啼雙鳥覆地殘花卧一猫
補岸魚攻新水入驅蚊松帶濕雲燒
一杯笑共隣翁話昨日栽完十畝苗

同和

瞿有仲

茅屋三間傍蓼蕭家貧還幸早輸徭
護花籬下牽衣犬報客檐前洗耳猫
桑酒熟時荷葉飲柳茶焙得竹枝燒
溪頭一夜霖盈尺村北村西盡放苗

同和

陸貽典

覆屋誅茅緝用蕭益餘儲聚戶無徭桃源舊日聞
雞犬草服殘年祀虎猫小港暗添春水足新田遙
帶晚雲燒清風更與人心便拂拂平疇喜翼苗

再次韵和喜雨

馮武

颯風四起拂葦蕭雨足窮鄉一歲徭涼入繩樞閒
襖襖烟深甕牖睡狸猫急流排岸忽忽去返炤迎
雲片片燒稚子驟看溝澮滿共芟園竹釣魚苗

同和

錢嘏

桔槔聲歇雨蕭蕭爭喜年豐足稅徭遶屋亂歸春

社燕一窠新出早蠶猫漁翁蓬底呼朋飲稚子烟
中摘菜燒明日雞豚齊上市家家相約賽青苗

同和

瞿有仲

千疇一夜雨蕭蕭更喜明朝暫緩徭荇藻平浮翻
亂鴨薄苜初長醉雛猫蝸蜒成字牕添画螢火飛
燈草不燒曳杖且從原上望青青生意滿新苗

雨中雜詠

桂花

陳瑚

天香蕭瑟雨中開漠漠秋雲暮色催只恐金風易
憔悴可能留得一枝來

前題

蕊含秋雨葉籠烟得得濃香滯遠天莫訝荆榛荒
桂路花開經雨已多年

馮武

向日葵

陳瑚

太陽炤物本無私爭奈羲和得馭遲消受凄風并
苦雨孤心端不要人知

前題

馮武

辛勤衛足餘根在宛轉當堦待日來可惜秋風連
夕雨此心應向阿誰開

白頭公

陳瑚

啼殘花下三春露叫破枝頭五夜霜秋雨襜褕還
自語笑他鶯燕為人忙

前題

馮武

孤立寒烟花色慘啼深秋雨頂毛摧新鶯休遂輕
頭白曾見春和麗日來

已亥正月十三日過子晉載德堂張燈夜飲
追憶昔游感而有贈凡四首

錢謙益

彈指經過十九年持螯把酒菊花前流光冉冉看
棋去往事騰騰中酒眠風伯訟隨天醉判井公博

與帝爭偏夜闌秉燭非容易開口何辭一笑顛
 書閣清齋初度辰祝延酌酒最情親貫花貝葉繙
 長壽炊飯香秔請應真席上半嗟揚解客井邊偏
 笑繫腰人湖南舍北同春水蕩槩相過肯厭頻辛巳
九月余六十初度避客南湖子晉為余開法筵供
 貫休十六應真像為余祝延坐客有戈莊樂李孟
 芳孫子長諸君今同矍
 圃之觀人去者半矣

迎門展齒走兒童一握歡聲笑語中盤簇試燈春
 宴餅簾喧留客石尤風金杯臘後輕浮碧銀樹花
 前早放紅夢裏華胥光景在未應惱殺白頭翁
 藍風劫雨過蒼茫安隱南湖舊草堂玉府珠林羅

典籍芝田蕙畝長兒郎殘編魚蠹春燈靜近局雞
 豚社酒香有約延緣葦閒櫂莫令餘子問滄浪

潛在見示牧齋先生載德堂張燈夜讌詩四

首次韵敬和以申瞻仰 陳 瑚

欲識荊州向立年牀頭還欠拜公前雨敲桑戶兼
 旬病雪滿袁門盡日眠湖北烟霞塵事少山南風
 月賞心偏放翁老學真先進壓帽梅花不道顛
 銀花火樹恰芳辰尊酒溫溫語笑親亂後山川如
 夢覺老來師弟倍情真貂裘風雪長征客油壁城
 闈不寐人何似杯湖兼退谷琴牀茗椀去來頻

新桃爆竹亂兒童剪燕鞭牛過眼中戶戶簾櫳歌
 夜月村村簫鼓醉春風珠屏翡翠當筵艷玉椀葡
 萄射蠟紅回首廿年成一笑再來同是白頭翁
 雲山羃羃水茫茫不及追陪載德堂一代周官存
 柱史五朝漢記屬中郎心依白社宗風遠手擘紅
 牋得句香醉墨淋漓爭誦習何如子美在滄浪
 歲終感懷呈潛在
 陳朝典
 霜鬢度歲嘆離居夢斷留侯圯上書卧雪孤衾春
 擁絮踏梅短屐晚巾車菰蘆荒徑聞啼鳥榆柳新
 烟出比閭一局笑過雞黍席醉橫天地是吾廬

二月朔訪確庵于頑潭溫如先生以中和一
 日作索和又示感懷一篇追叙九年別况

次韻奉酬兼柬確庵

毛晉

九載湖潯愴索居重尋正值夜攤書烟霞頰映飛
 觴燭風雪門盈問字車不設短籬豐五畝多收瑤
 草續三閭非漁也學垂綸釣四代怡然共一廬

潛在和家大人作次韵奉酬陳瑚

三徑蓬蒿仲蔚居蝸涎魚蠹一編書雪中夜過山
 陰權花外晴逢雒下車燕識故人窺翰墨鵲占佳
 日報門閭春來動地浮天水風月依然滿敝廬

次和

唐在

繞屋湖山稱隱居閑搜古閣舊藏書一經教子承
家學百里求賢置犢車種竹近開臨水徑炊烟遙
見隔村間避秦風景依然在笑指桃花共結廬

奉酬潛在見贈次韻

錢逵

釣竿獨占隱湖居遶屋桑麻插架書雖喜到門無
俗駕却嫌避地有高車鷗莊春水閒風景秦洞桃
花舊里間怪道百城高臥穩仲雍山對鄴侯廬

潛在過荒齋夜話有贈家大人作次韻奉酬

錢嘏

亂後何心更卜居三間老屋半床書良宵祇有賢
人酒今雨依然長者車漁笛近聞花外艇春燈遠
見柳邊間論文說劍雄心在喔喔雞聲出比廬

偶憇雲半居卽事

釋通門

美蔭半日息高雲亦吾依坐此不能去愛聽松風
微寂境不恒有閒心了無違相彼中林鳥飲啄鳴
且飛有念色斯舉匪矜毛羽輝冥冥逝已遠稻梁
非所希勞勞矰繳士徒煩設其機

宿珂月師雲半居見壁間牧和尚題詩因次

其韻

毛晉

翻嶺下危逕歸鳥隨烟依湖明顏返炤雨雜葉聲
微遠避北郭氛幽討性無違身在白雲裏永隔紅
塵飛一鐙漸耿耿蘿壁生光輝留題墨猶濕錫影
不可希讀罷斯須立靜對淡忘機

再疊前韵贈珂月上人

毛晉

一巢坐林杪孤跡獨無依萬松皆侍者鬚眉濕翠
微調飢慣能忍本性不可違夢回驚鳥呼牕破見
雲飛綠蔭層層結隱現湖波輝湖波堪撥棹船子
歌聲希野麋排闥入傲睨了無機

三疊前韵別與麼谷音二上人兼柬岫雲師

毛晉

雲半同一宿理策情依依忽聞松濤怒復見雨霏
微踞石各撫掌天公不吾違胸次無羈紲行止如
雲飛兩湖烟水濶蕩槩弄晴輝自怡復持贈此意
知者希寄語秀峰老帶月叩禪機

將過西華同潛翁宿雲半居和牧和尚韻

釋超慧

萬松一精舍群石相因依苔泉透蒼壁茶烟行翠
微念茲勝遊際言與長者違密林細雨響當檻陰
雲飛主人永佳夕篝燈發清輝良晤信非偶高談

心所希更闌妙香外自令人息機

重疊雲半居韵奉懷潛在

釋通門

一别又三載千里情依依昨來陟危磴自覺筋力
微同聲幸相存清吟不我違白雲檐下宿黃鳥林
間飛空山寂無人草木清且輝洋洋春雪調落落
古所希永懷眉山老遙話箭鋒機

冉冉半月迢迢百里追訪牧雲和尚如絳雲
舒卷過而不留槭詩寄訊輒得賜和好音
酬酢密于促膝復用前韵寄之

毛晉

神駿莫可追仙鶴莫可依千里又萬里如過一隙
微行止了無著吾願卒難違急昇繩床走忙逐蒲
帆飛狴座空秀嶺萬塔交光輝西華有萬佛塔庶借鄭公
風烟水或可希三復懷我音灑灑浣塵機

琴川迴棹潛在特來追訪余之所至翁亦至
焉入破山抵雲半居直達郡之西華皆先
後不數日而余又過石湖濱西資精舍松
陵之折蘆庵所謂池上也翁謂余踪跡杳
不可卽叠韵相寄余讀之喟然有荅

釋通門

餘生一無嗜山水相因依扁舟歷湖濱日日行翠
微空濛各有得款乃何相違聿看叢葦生坐惜春
花飛梅實漸已黃清池淡無輝委形若窮谷足音
安可希放懷讀君詩爛熳抒天機

己亥孟夏移居石村奉別父執潛在

王 瀉

廿年寒暑依簷宇一旦離愁奈若何村北湖南衣
帶水可堪春樹暮雲多
琴研圖書并一船匆匆行色夕陽邊幾回欲別重
維棹憶着孩提始到年

牙籤玉軸面昆湖文物衣冠舊表模今日頓違長
者席那堪飄泊一身孤

僧祐移居石村賦詩言別依韵送之

毛 晉

通貴橋頭德操所居共放船可堪又別隱湖邊溪南山
北人情異况值兵荒趨避年

僧祐臨別出所藏尊甫德操先生像求題再

用前韵書之卷尾

毛 晉

春秋佳日米家船不在山邊卽水邊得得閒來還
自課詩筒花譜過年年

何必稱狂賜鏡湖墻東自有祖貽模晨興禪誦鐘
魚肅夜靜琉璃炤影孤

訪天則和尚于維摩寺不值飛牋見投倚韵

酬之

毛晉

老樹干霄數卧遊緣厓跨澗挽扶留無心出岫孤
雲鶴常在當前露地牛一杖疑龍蟠古榻千花如
蝶散空樓閒來說法空牕下頑石應看盡點頭
蓋聞樹靜風來深抱擁鎌之痛書存澤在逾生
握卷之悲父兮已及強仕之年衰也方離懷抱
之內元禮攜手以登舟不負花天月地子驥尋

源而叩戶時過文虎人龍第媿將車持杖未從
聚德之遊炊飯成糜不諳委火之聽甫識萬仞
之桂俄崩千丈之松迸肺摧肝寢苦席藁未讀
喪禮忍誦遺吟邇者腰經旣除手琴成疊間繙
塵篋恒多觴詠之篇重輯殘編因識交遊之盛
玉山名勝清狂頗羨阿瑛金谷風流豪侈曾嫌
石氏挫糟凍飲停杯競賦連章蘭燭明膏搖筆
旋成數韵始乙丑盡己亥計年已及四旬登名
山濟勝水為詩不下萬首竊恐擊銅聲下不逮
推敲刻燭光中倘留瑕玷於是賫緡帙於頑潭

求藻鑒於夫子刪其蕪穢擷彼英華戲同洛水
丰神宛見當年集比蘭亭歌飲無殊往日持盃
賞月元白之興相符晦雨暝風皮陸之吟不輟
真可謂勝侶勝遊佳時佳詠者也歲時逝矣桑
海淒然追松柏之餘風凋零半盡念猿鶴之深
致人琴兩非和淚舐墨朝書夕寫兩弟分編三
卷千秋想見一時家傍隱湖詩多訓倡題曰隱
湖倡和詩間有英年戚友學步前人暇日壘篋
效顰往哲聊竊附驥之義匪循躡等之愆時也
玉露金風山河牢落虎年猴月村舍荒涼汲古

後人毛褒拜述

隱湖倡和詩卷下終



